

Tuesday, September 9, 2025

Time - 2:30pm

MJA HOLDS TALKS WITH GOVERNOR

MJA General Headquarters hruaituten vawiin khan Larsap General (Rtd) Vijay Kumar Singh chu a chenna Raj Bhavan-ah hmuin, an ngaihpawimawh thil hrang hrang an sawipui.

An inkawmnaah hian MJA hruaitute chuan, MJA member tan India sipai hmun pawimawh tlawh dilna Lok Sabha MP Pu Richard Vanlalhmangaiha kaltlanga Union Defence Minister, Pu Rajnath Singh hnena an theh luh chu a hlawhtlin theih nan theihtawp-a bawhzui sak turin an ngen a. Larsap chuan an ngenna chu a hlawhtlin theih nan theihtawp-a lo bawhzuipui tur thu MJA hruaitute chu a lo hrilh a ni.

An inkawmnaah hian Mizo thalai tam zawk sipai-a an luh theih nan theihtawp chhuahpui tur te; Mizo Regiment din theih dan tur te; Mizorama Army Battalion leh Airforce Station din a nih theih dan turte sawi lan a ni a. Sipai Officer-ah Mizo thalai tam zawk an luh theih nan Chhingchhip-a Sainik School chu tha taka a kal a, a changtlun zel theih nan hmalak dan tur pawh sawi a ni a. Larsap chuan, Mizo thalai sipai-a tan tum zingah lehkha pawimawh nei famkim lo an awm thin chu harsatna pakhat a nih thu MJA hruaitute chu a lo hrilh a. Sipai-a tan tumte chu lehkha pawimawh hrang hrang Voters ID, Aadhar Card leh Ration Card-ah te hming inmil thlap nei thin turin a chah a ni.



GST REFORMS

State Tax Commissioner Pu HK Lalhawngliana'n Sorkar laipuiin GST siamtha a, chhiah a tihhniam avangin vantlang mipui tan thil man a tlawm dawn a, sumdawngte pawh in hralh tha zawk tura ngaih an ni a ti.

Akashvani News zawhna chhangin, State Tax Commissioner Pu HK Lalhawngliana chuan GST siamthatna chu Prime Minister Narendra Modi-a'n Diwali puala ram mipuite hnena thilpek a hlan zulzuiin GST council hnuaia Group of Minister ten mipui nawlpuiin an hlawkpui theih tura an siam a ni a ti a, ngun taka an zirchian hnuah thil man atanga chhiah an lak thin zaa 28 atangin zaa 18, zaa 18 atanga zaa 12, leh zaa 12 atanga zaa 5 ah te tihhniam a ni a ti a. Chhiah tihhniam a nih avang hian bungraw man a tlawm loh theih loh avangin vantlang mipuite tan thil man a tlawm dawn a, tunhmaa thil an lei ngam loh te an lei ngam phah tawh dawn a, sumdawngte pawh in hralh tha zawk tura ngaih an ni a ti bawk.

Pu HK Lalhawngliana chuan sorkar laipuiin GST a siamthat chhan chu tax compliance a that zawk an rin vang a ni thei a ti a, hun rei lote chhung chu GST lakkhawm lamah Mizoram leh ram pum huapin tuar dawn mah se sorkar laipui chuan hei hi a huam a, rate rationalise a nih avanga an hloh tur te zangnadawmna chu state tin te a la pe leh mai turah a ngai tih a sawi.



FLORIST FAIR

Mizoram Florists' Association Fair chu Horticulture Department Additional Director Pi Lucy Zaithangpuii'n vawiin khan Aijal Club Park ah a hawng.

Vawiin September ni 9 atanga ni 12 awh tur, Mizoram Florists' Association Fair-ah hian dawr 102 awmin, pangpar chi hrang hrang kumtluana par chi atanga par hun bik nei in chhunga khawi chi, house plants bakah lei tha, damdawi, pot leh pangpar enkawl na hmanraw chi hrang hrang zawrh leh phochhuah a ni a, Horticulture Department Additional Director Pi Lucy Zaithangpuii chuan Mizoram Florists' Association hmalakna zarah Mizoram chuan pangpar a intodelh tawh hle a ti a, Florists' Association ten inchhung leh pawna dah chi pangpar chi hrang hrang taima leh duat taka an enkawl tawh te hmuh chu a hahdamthlak hle tih sawiin, mipui tam thei ang ber chu pangpar mawi zia en turin fair chu chhim ve turin a sawm a ni.

Mizoram Florists' Association Sr. Vice President Pi Vanlalzawni chuan Mizoram Florists' Association chu kum 25 chuang a ding tawh tih sawiin, an thil tum ber pakhat, Mizoram pangpara tih vul tih chu an ti hlawhtling chho mek a ti a,

thingtlang khaw hrang hranga zin changa kawtkaiia pangpar hmuh tur tam tak a awm tawh a ti a, Biak in leh hmun dangah te pangpar tak chauh khawi a nih theih nan tan an la zel a ti a, Florist Fair chu kumtin wawi 3 an nei thin a, kum tawp lamah pawh Winter Fair nei leh turin an inbuatsaih mek tih sawiin, mipuite chu he fair hi chhim ve turin a sawm a ni.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni. Zandin dar 6 leh a chanve-ah Chanchinthar puan leh a ni ang.



CSS EMPLOYEE

Sorkar Department hrang hranga CSS hnuaia thawkte intêlkhawm, All Mizoram CSS Employees Coordination Committee (AMCECC) chuan, sorkara an phût hrang hrangte tipuitling tura Mizoram sorkar an nawr nan vawiin atanga ni 3 chhung Mass Casual Leave an la ang.

All Mizoram CSS Coordination Committee General Body Meeting chuan tun thla ni 3 khan thuchhuah siamin, Mizoram sorkara an dinhmun siamthatna tur resolution an siam a, resolution-ah chuan CSS employee-te’n Regularisation Scheme an hman ve ngei theih nan siam rem ngai siam remsak tura sorkarin ngaihtuahna a sêng miah lo leh, DPAR Minister thurawn anga AMCECC-in representation an thehluh tawh lehkha an tihbosak leh, a thlenna tur official hnen a thleng lo chu mak an tih thu an sawi a, hei hi rang taka ngaihtuahsak a, tihhlawhtlinsak turin sorkar an phût thu an sawi a ni.



VICE PRESIDENT ELECTION

India Vice President thlanna chu tukin dar 10 aţang khan ţan a ni a, vawiin Thawhlejni tlai dar 6 aţangin vote tla hi chhiar nghal a ni ang.

Vice President ţang lai Jagdeep Dhankhar chu kumin July ni 21 khan a ban avangin a hmun ruak luahtu tur Vice President hi thlan a ni a, rorel lai BJP kaihhruai NDA aţangin Maharashtra Governor CP Radhakrishnan chu theh chhuah a ni a, Opposition INDIA bloc lam chuan Supreme Court Judge chawl tawh B Sudershan Reddy an ruat thung a, vote hi New Parliament building-ah thlak a ni.

Vice President thlang theitu hi Lok Sabha leh Rajya Sabha member te an ni a, tlai dar 5 thleng vote thlak theih a ni dawn a, Vice President thlang theitu - electoral college hi MP 781 an ni a heng zinga 238 chu Rajya Sabha niin mi 542 chu Lok Sabha an ni thung a ni.

Tun dinhmunah rorel lai NDA hian MP 425 an nei a, MP 11 nei YSR Congress Party’ in an thlawp dawn avangin 'an candidate hian vote 436 hmu tura ngaih a ni. Opposition INDIA bloc lam hi MP 324 thlawptu neia ngaih a ni.

